

INUIT ATAQATIGIIT

INATSISARTUNI



Nuuk, 2. april 2014

Inatsisartut suleriaasianni § 37 naapertorlugu imaattunik Naalakkersuisunut apeqqute-qarpunga.

Aatsitassarsiornermi Aningaasaateqarfimmut aningaasanik ilioraasarnissamik unioqqutitsiniarluni aatsitassarsiornermi ingerlatseqatigiiffiit tigussaasumik atortunik immiisalernissaannik teknikkikkut periarfissiinissamik ammaassiniarneq 2013-imi ukiakkut ataatsimiinnermi immikkoortoq 85-imut tunngatillugu tamatuma politikkikkut ilumut anguniagaasimanera suminngaanniit Naalakkersuisut tigussaasunik upternarsaatissaqartippaat?

Uanga ilisimasakka naapertorlugit periarfissaq anguniagarluunniit tamanna siunnersuuteqartutut uannit imaluunniit Aningaasaqarnermut Akileraartarnermullu Ataatsimiititaliamit immikkoortumut tunngatillugu isumaliutissiissusiornikuusumit taaneqanngisaannarnikuovoq. Naalakkersuisut qinnuigissavakka siunnersuutip Naalakkersuisut tungaannit paasineqarnerattut isikkoqarnera pil-lugu aalajangiiffigisassatut siunnersumminngaanneersunik imaluunniit isumaliutissiissumminngaanneersunik issuaanernik innersuussaqaqqullugit.

(Inatsisartuni ilaasortaq Naaja H. Nathanielsen, Inuit Ataqatigiit)

Tunngavilersuut

Inuussutissarsiornermut Aatsitassanullu Naalakkersuisoq Inatsisartunut kissaateqarnikuovoq tigussaasumik atortut (soorlu illuutit imaluunniit atortulersuutit) aatsitassarsiornermi aningaasaateqarfimmi isertitatut naatsorsuutigineqartassasut.

Isuma tamanna Inatsisartut akerlilernikuuaat aalajangernikuullutillu tigussaasumik atortut Aatsitassarsiornermi aningaasaateqarfimmi isertitatut naatsorsuutigineqartassangitsut. Tamatuma kingorna Inatsisartut aalajangererat tamatumalu anersaava ataqqillugu Naalakkersuisut pisussaaffeqarnikuupput inatsisissatut siunnersuusiusallutik.

Isumagali malillugu inatsisissatut siunnersuut, pingartumillu inatsisissatut siunnersuutip oqaaseqaatertai, Naalakkersuisut tusarniaassutigisaat Inatsisartut aalajangererannik tamatumalu anersaavanik siunertaanillu ilumooreginninnigillat. Naalakkersuisut ilaatigut malunnartinniartutut ippaat aatsitassarsiornermi ingerlatseqatigiiffiit akileraarutitigut akitsuutitigullu "ilanngaaserneqartarnissaat" Inatsisartut kissaatigigaat taakkununnga taarsiullugu illuutinik sanaartorunik. Tamanna ilumuunngilluinnaarlunilu sumiluunniit taaamatut allassimasoqanngilaq, soorlu aalajangiiffigisassatut siunnersummi, ataatsimiitilaap isumaliutissiissutaani imaluunniit ukiarmi Naalakkersuisut namminneerlutik akissuteqasiaanni.

Tamanna pitsaanngilaq, aamma siunnersuutimi itigartinneqarneranik Naalakkersuisut a-kuersiumannginnerat kingornalu aalajangererup tunngaviinik uukapaatitsiniarlutillu sa-ngutitsiniarnerat inatsisartoqarnermi ileq-qorissaarnermut naapertuutinngilaq.

Ullut suliffiusut qulit qaangiutsinnagit apeqqutit akineqareersimanissaat kissaatiginarpoq.